

Гулзода ЭГАМБЕРДИЕВА

**ВАТАН МАДҶИ ЯНГРАР
ДИЛИМДА**


(Шеърлар)

Қарши
«Насаф» нашриёти
2007

84(54)6

Гулзода Эгамбердиеванинг «Ватан мадҳи янграр дилимда» деб аталган ушбу мўъжазгина мажмуасида Ватанга бўлган муҳаббат, ота-она ва устозни улуғлаш, висол онлари қадри қаламга олинади. Шоиранинг илк тўпламини ўқиб баҳолаш сизга ҳавола, азиз китобхон!

Ю 34481
0



Э 4702620202- 57
376(12)2007 57- 2007

Г. Эгамбердиева, 2007 й.

ISBN 5-7323-0520-8

ВАТАН

Дунёга келибоқ очганда кўзим,
Ватан, сени ҳис қила билдим.
Ватан деган табаррук сўзни
Она каби муқаддас билдим.
Шон-шуҳратга тўлиқ Ватаним,
Келажаги буюк Ватаним.

Қанча олис юртларда юрмай,
Ватан, доим қалбимдадирсан.
Дилдан сени севиб ардоқлай,
Менинг қутлуғ саждагоҳимсан.
Дилда меҳрим, суюк Ватаним,
Саждагоҳим, буюк Ватаним.

Сенда иқбол, тинчлик мустаҳкам,
Амир Темур руҳи мужассам.
Ифтихорга тўлади қалбим,
Тарихингдан агар сўз очсам.
Тарихи минг дoston Ватаним,
Тинчлик учун посбон Ватаним.

Пахта, ғалла, бойликка консан,
Нефть ва газу олтинга консан.
Сени севмоқ муқаддас бурчдир,
Покиза нур, тоза виждонсан.
Олам аро номдор Ватаним,
Бағри чаман гулзор Ватаним.

Ватан, сендан топдим бахтимни,
Изҳор этай улуг аҳдимни.
Сенга содиқ фарзанд бўламан,
Халқим учун хизмат қиламан.
Шон-шуҳратинг ошсин Ватаним,
Келажаги буюк Ватаним.

ЎҚУВЧИЛИК, ЁШЛИК ЙИЛЛАРИМ

Эслайман мактабга илк борганимни,
Синфдош дўстлар-ла танишганимни,
Илк устозим билан учрашганимни,
Ўқувчилик, ёшлик йилларим.

Юксак орзуларга ошно эдик биз,
Тилаклар юксакда, хаёллар сўнгсиз,
Ўша ўйлар билан яшайман ҳануз,
Ўқувчилик, ёшлик йилларим.

Чуқур хаёлларга, ўйга толаман,
Ўша ўйлар билан эсга оламан,
Ўша ўйлар билан ҳамон боламан,
Ўқувчилик, ёшлик йилларим.

Ёшлик сирларига бу кўнгил асир,
Синфдош дўстларни эслайман бир-бир.
Ҳаётда безавол яшайман токи,
Қалбим эсламоққа, соғинчга қодир.

Гоҳо муҳаббатдан айланса бошим,
Синфдош дугонам бўлдинг сирдошим,
Доимо излайди сизни нигоҳим,
Ўқувчилик, ёшлик йилларим.

Ўқиб илм ила одоб мағзини,
Тарк айладик мактаб бағрини.
Соғинаман устоз меҳрини,
Ўқувчилик, ёшлик йилларим.

Йиллар ўтиб, улғайдик, ўсдик,
Камолотнинг фаслига етдик,
Қушлар каби тарқалиб кетдик,
Ўқувчилик, ёшлик йилларим.

Мен ҳам мурод, мақсадга етдим,
Бу ҳаётда ўрнимни топдим.
Аммо сенга талпинар қалбим,
Ўқувчилик, ёшлик йилларим.

Унутмайман мен сизни сира,
Пок ёдингиз тортмайди хира.
Сиз қалбда энг порлоқ хотира,
Ўқувчилик, ёшлик йилларим.



ДЎСТИМ, КЕЛДИ ЗАМОНАНГ

Дўстим ўқи, излан, келди замонанг,
Мустақил Ватанда имконинг бордир.
Қаёққа интилсанг, етади қўлинг,
Сени қўллагувчи юртбошинг бордир.
Юрт обод, озод ва сўлим диёрдир,
Эркесвар элларнинг толеи ёрдир.
Бошингда порлаган ҳурлик қуёши,
Ватаним чаманзор, мангу баҳордир.
Истиқлол айёминг муборак бўлсин,
Толеинг қуёши кулиб боқмоқда.
Ҳур замон яшасин, мангуға қолсин,
Келажак авлодлар униб ўсмоқда.
Тинчликесвар халқлар ёр бўлар сенга,
Олис-олислардан келар тўйингга.
Ҳар кунинг осуда, фаровон бўлсин,
Бахт олиб келтирсин обод уйингга.
Абадий яшасин ўзбек элимиз,
Жаҳон майдонида ноёб дурдона.
Юрагимиз тўлиб фахр этамиз,
Ватан ягонадир, Ватан ягона!
Ўзбекистон буюк она-юртимиз,
Мустақил, обод, ҳур, озод диёрдир.
Дўстим ўқи, излан, келди давронинг,
Сени қўллагувчи Ватанинг бордир!



ОНАМГА

Сиз бўлсангиз дунё гўзал онажон,
Сиз кулсангиз дунё кулар онажон.
Бириси кам дерлар асли дунёни,
Тўлиб турар сиз билан у, онажон.

Сиз авлод ва башарнинг бошисиз,
Тирикликнинг асл тамал тошисиз.
Сиз борсизки, ҳаёт гўзал, мунаввар,
Тириклик мангуга безавол яшар.

Сизнинг билан нурафшондир кенг жаҳон,
Қолмас зарра дилда армон, онажон.
Бағрингизда қувнаб, яйраб ўсгайман,
Сиз борсизки, мен бахтиёр бўлгайман.

Ўсиб камол топар умрим ниҳоли,
Она билан кулар фарзанд иқболи.
Мен сизни ардоқлаб камол топгайман,
Оналарни севган завол топмагай.

Ака-ука, опа-сингил, отажон,
Ҳаммамизга сиз меҳрибон чароғон.
Боғбондек ардоқлаб меҳр бергайсиз,
Умрингиз боғини фидо этгайсиз.

Бағрингизга бошгинамни қўяйин,
Меҳрингиздан тўйиб нафас олайин.
Тунлари соғиниб бедор бўлайин,
Худди сиздек бир фидокор бўлайин.

Борлиғимсиз, ҳаётимиз, онажон,
Бахтимизга бўлингиз доим омон.
Бу ҳаётда қолмайин ҳеч армонда,
Хушбахт даврон сурунг озод замонда.

Элда юзи ёруғ, моҳитоб бўлинг,
Фарзанд, набиралар роҳатин кўрунг.
Дунё тинч, элимиз фаровон бўлсин,
Уйимиз бахт, иқбол, шодликка тўлсин.
Ҳаётда бахтиёр даврон сурайлик,
Боболар руҳини шодон этайлик.
Бобо, момо бўлиб отам иккингиз,
Муроду мақсадга мудом етингиз.

Сиз билан ҳар ишга қодир бўламиз,
Сизлар билан доим фахр этамиз.
Шеърини бахш этди Сизга Гулзода,
Онажон, умрингиз бўлсин зиёда.



ОТАЖОН
(Падари бузрукворим, устозим
Қахрамон Эгамбердиевга)

Ховлимизда қолган қутлуғ изингизни,
Чақнаб турган меҳр тўла кўзингизни,
Қизим, дея эркалатган сўзингизни,
Отажоним, мен соғиндим ўзингизни.

Сиз олисда- Муборақда хизматдасиз,
Элу юртнинг ташвишида-иззатдасиз.
Меҳнат сизга обрў, давлат, бахт келтирди,
Кекса-ю ёш ардоғида, ҳурматдасиз.

Сизнинг билан оиламиз фаровондир,
Меҳрингизнинг нури билан чарағондир.
Ҳар бир фарзанд ота билан камол топгай,
Фарзанд бир гул, ота мисли бир боғбондир.

Сиз суянчиқ оға-ини баримизга,
Доим соғу омон бўлинг бахтимизга.
Ота билан мангу яшнар ҳаёт гули,
Мададқорсиз бу ҳаётбахш умримизга.

Доим соғлом, бардам бўлиб юринг деймиз,
Хур диёрда даври даврон суринг деймиз.
Онам билан қўша қариб пир-бадавлат,
Давраларда дилдан яйраб кулинг деймиз.

Орзуингиз фарзандларнинг бахт, камоли,
Фарзанд билан кулар ота, она иқболи.
Ота фарзанд орзусига етган маҳали,
Турмуш гўзал, яшнаб кетар Ватан жамоли.

Орзулари тўлиб тошган кўнглингизни,
Бизга паноҳ иссиқ кучоқ бағрингизни,
Хар бир айтган насиҳату сўзингизни,
Отажоним, соғиндим мен ўзингизни.



ОРЗУ

Ёшликдаги орзуимга,
Етдим бугун, онажон.
Ўниб-ўсиб бу ҳаётда,
Ўрним топдим, онажон.

Синовлардан ўтиб доим,
Олға томон бораман.
Жуда ойдин борар йўлим,
Мақсадимга етаман.

-Қизим, бордир бир орзуим,
Бўлсанг эди шоира.
Тангри қўлласин доим,
Бахт ато этсин сенга.

Ақл уйинг равшан бўлсин,
Сен дунёни ўйлагин.
Худо сенга илҳом берсин,
Бахт-иқболни куйлагин.

-Онажоним, бир кун келиб,
Шоира ҳам бўларман.
Илк шеъримни сизга атаб,
«Онажон» деб атарман.

Менга ҳаёт ато этиб,
Илҳом берган ўзингиз.
Қўлларимга мангу тушмас,
Қалам берган ўзингиз.

- Айтганларинг келсин, қизим,
Шунда қолмас армоним.
Сенинг билан яшнар умрим,
Кулар даври давроним.

Орзуимга етсам агар,
Умрим завол топмайди.
Она умри дунё қадар,
Фарзандида яшайди.
-Онажон, меҳрибоним,
Фидо бўлсин сизга жоним.
Шеърим битди, ёруғ юзим,
Дилда йўқдир армоним.



ОНАЖОНИМГА

Жонажоним, онажон,
Меҳрибоним онажон.
Бахтимизга ҳар қачон,
Яшаб юринг соғ, омон.
Она ҳаёт қувончи,
Оиланинг таянчи.
Мададкордир бир умр,
Фарзандининг суянчи.
Мунаввар нур, дурдона,
Олам аро ягона.
Онажоним, сиз доим,
Бошимизда парвона.
Оқ сут бериб ўстирган,
Меҳри билан тўйдирган.
Қалбимизда эзгулик
Гулларини ундирган.
Ўзингизсиз, онажон,
Ўзингизсиз меҳрибон.
Сиз дунёда боримсиз,
Муқаддас гулзоримсиз.
Бу дунёда ягона,
Хазонсиз баҳоримсиз.
Сизсиз менинг қувончим,
Ёлғизгина сирдошим.
Ҳаётнинг йўлларида,
Суянчиғим, таянчим.
Сизга дил роз айтамиз,
Доим эъзоз этамиз.
Берган сутингиз оқлаб,
Баланд парвоз этамиз.

УСТОЗИМ

Илк мактабга келганимда,
Кутиб олган устозим.
Менга илк бор «Алифбо»ни
Ўргатган Сиз, устозим.

Она каби парваришлаб,
Ўстиргансиз ўзингиз.
Тиним билмай сабоқ бериб,
Йўл кўрсатган ўзингиз.

Чин юракдан ҳавас қилиб,
Орзу қилдим мен шуни:
Сизга ўхшаб аъло ўқиб,
Устоз бўлай бир куни.

Йиллар ўтар, келиб бир кун,
Мен ҳам устоз бўларман.
Шогирдларни янги, нурли
Манзилларга элтарман.

Ўшанда ҳам сизни асло,
Унутмайман устозим.
Мен учун сиз мангу ҳаёт,
Йўлчи юлдуз устозим.

Биз шогирдлар номингизни,
Дилимизда сақлаймиз.
Бизга берган сабоғингиз,
Илмингизни оқлаймиз.

Устоз номи мангу яшар,
Ёшларнинг иқболида.
Орзулари ушалади,
Шогирдлар камолида.

Меҳнати кўринади,
Ҳар бир ёш парвозида.
Бахт, иқболи кулади,
Элу юрт эъзозида.



БУ ЮРАК

Қаёқдан биласан, балки бу юрак,
Кимнидир пинҳона севиб қолгандир.
Севгидан туғилар орзу ва тилак,
Юксак туйғуларга ошно бўлгандир.

Хукм этиб бўлмас юракка,
Бу танда у танҳо ҳукмрон.
Қанот берар орзу-тилаклар,
Сирларини тутмайди пинҳон.

Жўш уради, қайнаб тошади,
Келажакка ундайди ҳар дам.
Сарҳадлардан тошиб ошади,
Унга ғайрат ва идрок ҳамдам.

Қаёқдан биласан, балки юраклар,
Бир-бирига ошно бўлгандир.
Чечак отиб орзу, тилаклар,
Вафо бўстонида кулиб тургандир.

Севги билан кўзлар чарақлар,
Юракларда чақнайди чақин.
Муҳаббатдан сармаст юраклар
Уммон мисол кўтарар тўлқин.

Билиб қўйгин, билгин бу юрак,
Муҳаббатга мангу ошиён.
Туйғулари жўш урар мудом,
Мисоли бир бўронли уммон.

МУҲАББАТ

Бунчалар буюксан, муҳаббат,
Бунчалар суюксан, муҳаббат.
Сен инсон қайғуси, қувончи,
Ҳаётнинг ўзисан, муҳаббат.


Кимларни суйдириб севинтирасан,
Кимларни куйдириб куйинтирасан.
Ўртанган юракни овунтирасан,
Роҳатим, азобим, муҳаббат.

Инсонлар сен билан буюқдир,
Бу ҳаёт сен билан тирикдир.
Қалб уйим сен билан ёруғдир,
Қалбдаги чироғим, муҳаббат.

Кўнглимга бахш этдинг зиёни,
Танитдинг ғанимни, ошнони.
Мен сенда кўраман дунёни,
Кўзларим, қароғим, муҳаббат.

Сен билан жўшади ижодим,
Келажак ҳаётим, зурёдим.
Сен билан тўлиқдир ҳаётим,
Висолим, фироғим, муҳаббат.

Мен сени муқаддас асрайман,
Сенки бор экансан, ўлмайман.
Доимо улуғлаб яшайман,
Қалбдаги эъзозим, муҳаббат.



Сенда бир илоҳий қудрат яширин,
Висолинг, фироқинг, азобинг ширин.
Ҳеч ким англай олмас ҳеч қачон сириг,
Ҳамиша бор бўлгин, бор бўл, муҳаббат.

ҲАЁТ СИНОВЛАРИ

Бисёр экан ҳаётнинг синовлари,
Ҳар қадамда дуч келади ғовлари.
Ҳар кимсанинг кўп бўлса ҳам дўстлари,
Учраб турар ғанимлари, ёвлари.

Бу ҳаётда адашса, қўқилса ҳам,
Ғанимлари йўлига ғов солса ҳам.
Синовлардан иродага таяниб,
Ғолиб инсон енгиб ўтар доим ҳам.

Ақлу идрок, ирода, сабру тоқат,
Таянч бўлар одамларга ҳамма вақт.
Доно инсон йўлидан адашмайди,
Доноларга ҳамроҳ бўлар, омад, бахт.

Улар синовларни енгиб ўтади,
Адашмайди, асло йўлда қолмайди.
Ишонч, меҳнат билан олға интилиб,
Бир кун мурод, мақсадига етади.

Доно, мард инсонлар элнинг камоли,
Яйрайди, яшнайти юртнинг жамоли.
Синовлардан ўтиб юксакка етиб,
Доим порлаб турар юлдуз мисоли.

Бизлар ҳам улардан ибрат олайлик,
Ақлу заковатни машъал қилайлик.
Хаёт йўлларида адашмай туриб,
Бахтли келажакка етиб борайлик.

МЕН СЕНИ УНУТОЛМАДИМ

Мен сени бир зум ҳам унутамадим,
Юрагимдан асло чиқаролмадим.
Сенсиз яшамоққа уриндим, аммо,
Хаёлимдан олиб кета олмадим.

Инсонлар муҳаббат билан туғилган,
Муҳаббат тан билан жонга йўғрилган.
Муҳаббатсиз асло яшаб бўлмайди,
Муҳаббат тақдирда азал ёзилган.

Сен кетдинг, қалбимда муҳаббат қолди,
Интизор кўзларим йўлингда толди.
Қалбимда муҳаббат мангуга қолиб,
Ором, ҳаловатим мангу йўқолди.

Гоҳида сен билан суҳбат қураман,
Хаёлий висолдан шодон куламан.
Менинг хаёлимда ҳамиша борсан,
Сенинг ёдинг билан куйлаб ўтаман.

Фақат шеър бўлади кўнглимга дармон,
Унинг дарди билан ором олар жон.
Оташин сатрлар қоғозга тушса,
Юрак ором олар, қолмайди армон.

Ҳамиша ўз-ўзим билан ёнаман,
Гоҳида кўнглимга таскин бераман.
Унутмасман сени мен ҳеч қачон, асло,
Бир куни ёнингга балки борарман.

ОНА ТИЛАГИ

Ўниб-ўс, доимо ҳеч кўрмагин ғам,
Дилингда ҳеч бўлмасин армон.
Кулгинг-ла қалбимни эта олсанг шод,
Барча шодликларни сенга тилайман.

Йўлларинг доимо нурларга тўлса,
Кўзларинг қуёшдек чарақлаб турса.
Шодликларинг кўриб қалбдан қувонса,
Барча қувончларни сенга тилайман.

Бир куни улғайиб катта бўларсан,
Ҳаётдан муносиб ўрин топарсан.
Бахтиёр кўзларинг кўриб севинсам,
Барча севинчларни сенга тилайман.

Ватаннинг бир содиқ фарзанди бўлсанг,
Она еримизнинг посбони бўлсанг,
Ваъдага вафодор, аҳдингда турсанг,
Инсон қамолини сенга тилайман.

Ижобат бўлади она дуоси,
Фарзанд қамолидир чин муддаоси.
Ҳеч қачон сўнмасин кўзинг зиёси,
Нури Муҳаммадни сенга тилайман.

Тилагим: соғ яша озод замонда,
Омадинг ёр бўлсин, қолма армонда,
Бахти баркамол бўл, умри зиёда,
Болам, хуш умрни сенга тилайман.

СЕВГИЛИМ

Кўз ўнгимда турар жамолинг,
Хаёлимдан кетмайсан ҳамон.
Қалб қумсайди сенинг висолинг,
Фақат сени севаман, ишон.

Сенсиз ўтган кунларим азоб,
Сенсиз менга тордир бу дунё.
Сенсиз менга татимас ҳаёт,
Кўзларимга беролмас зиё.

Бу ҳаётнинг боши муҳаббат,
Пайванд этар қалбларни қалбга.
Бу ҳаётнинг нури муҳаббат,
Унинг билан нур тўлар қалбга.

Муҳаббатга ошно юраклар,
Юксакларга ундайди бизни.
Қанотланар орзу, тилаклар,
Ёритади умр йўлини.

Муҳаббатга ошно юраклар,
Саҳроларда яратар бўстон.
Ундан ижод илҳоми жўшар,
Ёзилади шеър,ғазал, дoston.

Муҳаббат ҳаётни ўргатар,
Яшамоқни ўргатар бизга.
Насиб этсин гўзал туйғулар,
Ҳар йигитга, ҳар битта қизга.

Бирга бўлсак севгилим сен-ла,
Кўнглимда ҳеч қолмайди армон.
Бахтиёрман сен билан бирга,
Муҳаббатим сўнмас ҳеч қачон.

Соғинаман мен сени ҳамон,
Висол дами кўнглимда ҳавас.
Писанд эмас мен учун ҳижрон,
Хаёлимда кулиб турсанг бас.



Мундарижа

Ватан.....	3
Ўқувчилик, ёшлик йилларим.....	4
Дўстим келди замонанг.....	6
Онамга.....	7
Отажон.....	9
Орзу.....	11
Онажонимга.....	13
Устозим.....	14
Бу юрак.....	16
Муҳаббат.....	17
Ҳаёт синовлари.....	18
Мен сени унутолмадим.....	19
Она тилаги.....	20
Севгилим.....	21

АДАБИЙ-БАДИЙ НАШР
ГУЛЗОДА ЭГАМБЕРДИЕВА
ВАТАН МАДҲИ ЯНГРАР ДИЛИМДА

(Шеърлар)

Мухаррир: Ш.Пирматова.
Техник муҳаррир: Ч.Раҳмонов.
Мусахҳиҳ: Ш.Маҳмудова.
Бадий безакчи: Б. Темиров

ИБ 1127

Теришга 29.11.2007 йилда берилди. Босишга 3.12.2007 йилда рухсат этилди. Бичими 60x84 1/16. Шартли босма табоғи - 1,26. Шартли бўёқ - отт-1,32. Нашр босма табоғи - 0,72. 75-2007-шартнома. 103 - буюртма. 200 нусхада. Эркин нарҳда.

«Насаф» нашриёти, 180118, Қарши шаҳри, Мустақиллик шоҳ кўчаси, 22-уй.

Қашқадарё вилоят Матбуот ва ахборот бошқармаси ҳузуридаги «Матбаа» цехида чоп этилди.

Қарши шаҳри, Мустақиллик шоҳ кўчаси, 22-уй.